

Sadržaj – Brčko distrikt

<i>Kako prijaviti korupciju i ostvariti pravnu zaštitu?</i>	2
<i>Osnovne informacije o zaštićenom prijavljivanju korupcije</i>	3
Šta je zaštićeno prijavljivanje korupcije?	3
Ko može prijaviti korupciju?	3
Ko ima pravo na zaštitu zbog prijavljivanja korupcije?	3
Da li je dozvoljeno anonimno prijavljivanje korupcije?	4
Da li se prijava korupcije od strane uzbunjivača tretira kao povjerljiva?	4
Koje se nepravilnosti mogu prijaviti?	4
Da li je za prijavljivanje korupcije neophodno imati dokaze ili je dovoljno da se prijavljivanje vrši na osnovu razumnog vjerovanja?.....	4
Da li se u postupku dodjele zaštite uzbunjivaču preispituje njegova dobra vjera kod prijavljivanja korupcije?	5
Šta je zloupotreba prijavljivanja i koje su posljedice?	5
Da li su zviždači izuzeti od disciplinske, građanske ili krivične odgovornosti?	5
<i>Postupak prijavljivanja korupcije</i>	6
Koje vrste prijavljivanja korupcije postoje?	6
Kako se vrši interno prijavljivanje?.....	6
Koji postupak se provodi nakon prijema interne prijave?	7
Kada se može vršiti eksterno prijavljivanje?	7
Kada je moguće izvršiti javno prijavljivanje korupcije?.....	7
<i>Zaštita zviždača od štetnih radnji</i>	9
Kakvu zaštitu Zakon pruža zviždaču?	9
U odnosu na koje štetne radnje zviždač uživa zaštitu?	9
Šta je i kako se dobiva status zviždača?	9
Kakvu zaštitu može dobiti zviždač koji trpi štetne posljedice?	9
Pod kojim uslovima se obustavlja zaštita?	10
<i>Pravna pomoć</i>	11
Koja pravna pomoć je na raspolaganju zviždačima?.....	11
Koje dodatne informacije o postupku zaštićenog prijavljivanja korupcije su dostupne?	11
<i>Dodatni izvori informacija</i>	12

Kako prijaviti korupciju i ostvariti pravnu zaštitu?

Ovaj sadržaj ima za cilj da javnosti pruži informacije o mogućnostima zaštićenog prijavljivanja korupcije u Brčko distriktu. U nastavku možete saznati šta podrazumijeva zaštićeno prijavljivanje, ko može prijaviti korupciju, te koje se nepravilnosti mogu prijaviti. Također, možete se informisati o načinima podnošenja prijave, kao i kome je moguće podnijeti prijavu. U sadržaju koji slijedi daju se informacije o mogućnostima zaštite od štetnih radnji koje mogu biti poduzete radi odvracanja od podnošenja prijave ili odmazde zbog podnesene prijave.

Na osnovu informacija koje slijede možete procijeniti informacije koje imate na raspolaganju, a koje mogu upućivati na korupciju, te donijeti odluku da li vaša saznanja pružaju osnov za zaštićeno prijavljivanje korupcije te koje su moguće posljedice kako prijavljivanja korupcije tako i zloupotrebe prijavljivanja korupcije.

Ovaj sadržaj je izrađen na osnovu važećih propisa, prvenstveno Zakona o zaštiti lica koja prijavljuju korupciju u institucijama Bosne i Hercegovine. Informacije koje su predočene nemaju funkciju pravnog savjeta te se za ovu svrhu preporučuje detaljno konsultovanje zakonskog teksta i obraćanje nadležnim tijelima. U sadržaju koji slijedi daju se informacije o institucijama i organizacijama koje pružaju pravnu pomoć.

Osnovne informacije o zaštićenom prijavljivanju korupcije

Šta je zaštićeno prijavljivanje korupcije?

Zaštićeno prijavljivanje je prijavljivanje korupcije koje podliježe zaštiti lica koje podnosi prijavu, u skladu sa Zakonom o zaštiti lica koja prijavljuju korupciju („Službeni glasnik Brčko distrikta BiH“ broj 25/18, dostupno na

<https://skupstinabd.ba/ba/zakon.html?lang=ba&id=/Zakon%20o%20zas--titi%20lica%20koja%20prijavljuju%20korupciju>, u daljem tekstu: Zakon).

Lice koje podnosi prijavu u skladu sa uslovima određenim Zakonom se naziva “zviždač”. Lica koja dobiju status zviždača u skladu sa Zakonom, imaju pravo na zaštitu odnosno korektivne mjere u odnosu na štetnje radnje.

Zaštićeno prijavljivanje obuhvata prijavljivanje korupcije u organima javne uprave i institucijama, javnim preduzećima, ustanovama i drugim pravnim licima koje je osnovao Brčko distrikt, pravnim licima i preduzetnicima, uključujući podnošenje tužbe, žalbe ili prigovora, kao i svjedočenje na sudu ili u disciplinskom postupku, te saradnju sa istražnim organima.

Poseban oblik zaštićenog prijavljivanja je javno objavljivanje ili na drugi način činjenje javno dostupnim informacija koje ukazuju na korupciju.

Ko može prijaviti korupciju?

Svako lice zaposleno u organima javne uprave i institucijama, javnim preduzećima, ustanovama i drugim pravnim licima koje je osnovao Brčko distrikt, pravnim licima i preduzetnicima, kao i svako drugo punoljetno lice bez obzira na radno-pravni status, može nadležnom autoritetu podnijeti prijavu zbog sumnje ili okolnosti na postojanje korupcije, ako ima informacije ili materijalne dokaze o postojanju korupcije.

Ko ima pravo na zaštitu zbog prijavljivanja korupcije?

Zaštićeno prijavljivanje, prema Zakonu, se odnosi na sva lica zaposlena u organima javne uprave i institucijama, javnim preduzećima, ustanovama i drugim pravnim licima koje je osnovao Brčko distrikt, pravnom licu i preduzetniku, kao i svako drugo punoljetno lice bez obzira na radno-pravni status, koje zbog opravdane sumnje ili okolnosti na postojanje korupcije u dobroj vjeri podnese prijavu odgovornim licima ili institucijama u skladu sa Zakonom.

Status zaštićenog zviždača omogućuje zaštitu od štetnih radnji i dodjeljuje se zviždaču koji u dobroj vjeri podnese prijavu o postojanju korupcije, bez obzira da li je nastupila neka od štetnih mjera ili prijavitelj samo sumnja da bi se prema njemu mogla preduzeti štetna mjera. Zaštićeno prijavljivanje teče od dana podnošenja prijave o korupciji.

Zakon ne štiti eksplicitno one koji pomognu zviždaču da podnese prijavu, niti one koji su s njim povezani (npr. kolege, članove porodice, prijatelje). Zakon također ne štiti eksplicitno lica koja se pripremaju da prijave korupciju (rade istraživanje neophodno za prijavu koje odražava opravdan razlog za vjerovanje da je prijava istinita) ili za koje se (pogrešno) sumnja da su prijavili korupciju.

Da li je dozvoljeno anonimno prijavljivanje korupcije?

Anonimno prijavljivanje nije regulisano Zakonom.

Model pravilnika o internom prijavljivanju korupcije i zaštiti lica koje prijavi korupciji, koji je predložen institucijama od strane Agencije za prevenciju korupcije i koordinaciju borbe protiv korupcije, predviđa mogućnost anonimnog internog prijavljivanja i ova preporuka je preuzeta pravilnicima o internom prijavljivanju i zaštiti lica koje prijavi korupciju u Brčko distriktu.

Da li se prijava korupcije od strane uzbunjivača tretira kao povjerljiva?

Zaštita identiteta i identifikacijskih podataka zviždača nije regulisana Zakonom.

Model pravilnika o internom prijavljivanju korupcije i zaštiti lica koje prijavi korupciji, koji je predložen institucijama od strane Agencije za prevenciju korupcije i koordinaciju borbe protiv korupcije, predviđa mogućnost povjerljivog internog prijavljivanja. Povjerljivo interno prijavljivanje je prijavljivanje koje podrazumijeva da je licima nadležnim za prijem internih prijava poznat identitet lica koje je podnijelo prijavu, ali su dužni da samu prijavu, podatke navedene u prijavi, kao i identitet lica koje je podnijelo prijavu tretiraju kao službenu tajnu. Ovo rješenje je preuzeto pravilnicima o internom prijavljivanju i zaštiti lica koje prijavi korupciju u Brčko distriktu te ovim pravilnici predviđaju mogućnost povjerljivog internog prijavljivanja.

Koje se nepravilnosti mogu prijaviti?

Zakon predviđa da lica može prijaviti informacije o radnjama ili propustima za koje razumno vjeruje da predstavljaju korupciju.

Prema Zakonu, korupcija je svaka zloupotreba moći povjerena državnom službeniku, zaposleniku, savjetniku, izabranom ili imenovanom licu u zakonodavnoj, izvršnoj ili sudskoj vlasti Brčko distrikta Bosne i Hercegovine (u daljnjem tekstu: Distrikt), uključujući javna preduzeća, ustanove i druga pravna lica koje je osnovao Brčko distrikt, i poslodavcu i radniku, koja može dovesti do privatne koristi tog lica, ili bilo kojeg drugog fizičkog ili pravnog lica; korupcija posebno može uključivati direktno ili indirektno zahtijevanje, nuđenje, davanje ili prihvatanje mita ili neke druge nedopuštene prednosti ili njenu mogućnost, čime se narušava odgovarajuće obavljanje bilo kakve dužnosti ili ponašanje očekivano od primaoca mita.

Da li je za prijavljivanje korupcije neophodno imati dokaze ili je dovoljno da se prijavljivanje vrši na osnovu razumnog vjerovanja?

Lice može nadležnom autoritetu podnijeti prijavu zbog sumnje ili okolnosti na postojanje korupcije ako ima informacije i/ili materijalne dokaze o postojanju korupcije.

Da bi uživao zaštitu zviždač nije obavezan prikupiti i dostaviti dokaze o korupciji koju prijavljuje.

Da li se u postupku dodjele zaštite uzbunjivaču preispituje njegova dobra vjera kod prijavljivanja korupcije?

Prema Zakonu, dobra vjera je uslov za zaštićeno prijavljivanje odnosno dodjeljivanje statusa zviždača. Dobra vjera je vlastito saznanje zviždača koje se zasniva na činjenicama i okolnostima koje zviždač smatra istinitim. Ukoliko se dokaže da zviždač prilikom podnošenja prijave nije postupao u dobroj vjeri, pružanje zaštite zviždaču se obustavlja.

Šta je zloupotreba prijavljivanja i koje su posljedice?

U slučaju da se u toku postupka dokaže da zviždač prilikom podnošenja nije postupao u dobroj vjeri, pružanje zaštite zviždaču se obustavlja, a odluka o obustavi pružanja zaštite se dostavlja zviždaču i rukovodiocu organa javne uprave i institucije, javnog preduzeća, ustanove i drugog pravnog lica koje je osnovao Brčko distrikt, pravnog lica i preduzetnika u kojem je zviždač zaposlen.

Zloupotreba prava prijavljivanja, prema Zakonu, predstavlja tešku povredu radne dužnosti. Lice koje svjesno lažno prijavi korupciju kaznit će se novčanom kaznom u iznosu od 500 do 1.500 KM za prekršaj.

Ako se tokom postupka po prijavi otkrije da zviždač nije postupao u dobroj vjeri, odnosno da je svjesno podnio lažnu prijavu i ako se utvrdi postojanje elemenata krivičnog djela, protiv lica se podnosi krivična prijava.

Da li su zviždači izuzeti od disciplinske, građanske ili krivične odgovornosti?

Zviždač se neće smatrati materijalno, krivično ili disciplinski odgovornim za otkrivanje poslovne tajne u slučaju prijavljivanja korupcije nadležnom autoritetu.

Prema Zakonu, pokretanja disciplinskog postupka je jedna od štetnih radnji kojima poslodavac nanosi štetu zaposlenom zbog prijavljivanja korupcije.

Postupak prijavljivanja korupcije

Koje vrste prijavljivanja korupcije postoje?

Prijavljivanje korupcije može biti interno i eksterno.

Interno prijavljivanje se vrši nadređenom ili drugom licu u instituciji u kojoj je lice koje prijavljuje zaposleno, a koje je po ovlaštenjima odgovorno za zakonit rad institucije, kao i licu ili organu koji obavlja poslove nadzora ili revizije u institucijama Brčko distrikta.

Eksterno prijavljivanje se vrši policiji, tužilaštvu ili Uredu za prevenciju korupcije i koordinaciju aktivnosti na suzbijanju korupcije Brčko distrikta.

Eksterno prijavljivanje je moguće izvršiti i prema javnosti, što predstavlja poseban oblik zaštićenog prijavljivanja.

Kako se vrši interno prijavljivanje?

Interno prijavljivanje vrši se na način uređen internim aktom institucije o prijavi i zaštiti zviždača. Svaka institucija je dužna donijeti ovaj interni akt koji treba biti vidno istaknut u prostorijama institucije i njenoj Internet stranici. Nedonošenje internog akta predstavlja prekršaj te će se za ovaj prekršaj kazniti rukovodilac institucije novčanom kaznom u iznosu od 500 do 2.000 KM.

Internim aktom se uređuje način internog prijavljivanja korupcije, postupanje po zaprimljenim prijavama, razmatranje zaprimljenih prijava, obaveza obavještanja lica koje je prijavilo korupciju o poduzetim radnjama, zaštita lica koje prijavi korupciju i druga pitanja koja su vezana za interno prijavljivanje korupcije. Ovim aktom se također određuje nadležna služba, tijelo ili lice za prijem i razmatranje prijave, kao i sadržaj prijave.

Interna prijava se može podnijeti i neposredno rukovodiocu institucije u slučaju da rukovodilac institucije nije donio interni akt o prijavi i zaštiti ili postupak internog prijavljivanja nije poznat, odnosno ako u prostorijama i na internetskoj stranici institucije nije jasno i na vidnom mjestu istaknuto obavještenje o nadležnoj službi, tijelu ili licu za prijem i razmatranje prijave. Neposredna prijava rukovodiocu se može izvršiti i ako zviždač ima razloga da vjeruje da se ovlašteno lice kojem se prema internom aktu podnosi prijava direktno ili indirektno dovodi u vezu s koruptivnom radnjom.

Zakon ne reguliše način podnošenja prijave, ali Model pravilnika o internom prijavljivanju korupcije i zaštiti lica koje prijavi korupciji, koji je predložen institucijama od strane Agencije za prevenciju korupcije i koordinaciju borbe protiv korupcije i čija su rješenja preuzele institucije Brčko distrikta, propisuje da povjerljivo interno prijavljivanje može biti pismeno ili usmeno.

Prema ovom modelu, kada se prijavljivanje vrši u pisanoj formi prijava mora da sadrži informaciju o djelu korupcije ili druge nepravilnosti koja se prijavljuje sa činjeničnim opisom, ime, prezime i naziv radnog mjesta zaposlenog na kojeg se prijava odnosi, prijedlog o dokazima, odnosno predmetima koji služe kao dokaz, materijale koji potvrđuju navode zahtjeva (u smislu pismenih dokaza, u prilogu), ime, prezime, poziciju (radno mjesto) i svojeručni potpis lica koje je podnijelo prijavu. Poseban obrazac za prijavljivanje korupcije nije propisan Zakonom, ali pravilnici institucija o internom prijavljivanju korupcije i zaštiti lica koja prijavi korupciju mogu sadržavati obrazac za prijavu korupcije.

Kada se prijavljivanje vrši usmenim putem, lice kojem je prijava podnesena dužno je o prijemu iste sačiniti službenu zabilješku.

Anonimno prijavljivanje može biti samo pismeno. Anonimna prijava treba da sadrži informaciju o djelu korupcije ili druge nepravilnosti koje se prijavljuju sa činjeničnim opisom, ime, prezime i naziv radnog mjesta zaposlenog na kojeg se prijava odnosi, prijedlog o dokazima, odnosno predmetima koji služe kao dokaz, materijale koji potvrđuju navode zahtjeva (u smislu pismenih dokaza, u prilogu).

Lice ovlašteno za prijem i evidenciju prijave korupcije dužno je svaku zaprimljenu prijavu, odnosno službenu zabilješku o prijavi, odmah i direktno dostaviti rukovodiocu pri čijem uredu se vodi centralna evidencija svih internih prijave korupcije i drugih nepravilnosti.

Koji postupak se provodi nakon prijema interne prijave?

Zakon ne reguliše postupanje po prijemu interne prijave. Međutim, Model pravilnika o internom prijavljivanju korupcije i zaštiti lica koje prijavi korupciji, koji je predložen institucijama od strane Agencije za prevenciju korupcije i koordinaciju borbe protiv korupcije i čija su rješenja preuzele institucije Brčko distrikta predviđa da rukovodilac institucije odredi lice koje je ovlašteno provesti prethodne radnje utvrđivanja osnovanosti prijave. Prethodne radnje osnovanosti navoda iz prijave i utvrđivanje pravne kvalifikacije prijavljenog djela se provode u roku od 10 dana od dana dobijanja zaduženja, a o ishodu ovih radnji se informiše rukovodilac institucije. O poduzetim prethodnim radnjama se obavještava podnosilac prijave, najkasnije u roku od 15 dana od dana prijema prijave. Anonimni podnosilac prijave će biti obavješten o poduzetim prethodnim radnjama ako postoji odgovarajuća mogućnost komunikacije (npr. anonimni email).

Lice koje je ovlašteno za provođenje prethodne radnje i utvrđivanja osnovanosti prijave dužno je svaku internu prijavu detaljno razmotriti. Ovo obuhvata neposredni uvid u predmete, akte i službene prostorije institucije kao i uzimanje izjave od državnih službenika, zaposlenika i drugih zaposlenih u instituciji vezano za predmet prijave. Na osnovu nalaza, lice koje je ovlašteno za provođenje prethodne radnje daje mišljenje o osnovanosti prijave i eventualnoj pravnoj kvalifikaciji djela.

Ukoliko je utvrđena osnovanost prijave, radnje koje mogu biti poduzete uključuju pokretanje disciplinskog postupka, informisanje nadležnog tužilaštva ukoliko djelo ima obilježja krivičnog djela, te radnje radi sprečavanja daljeg nepravilnog postupanja i otklanjanja štetnih posljedica počinjenog djela.

Kada se može vršiti eksterno prijavljivanje?

Zviždač može eksterno prijaviti korupciju u slučaju kada postupak po internom prijavljivanju traje duže od 15 dana. Eksterno prijavljivanje se također može vršiti ukoliko zviždač smatra da je interni postupak po prijavi bio nepravilan ili zviždač ima razloga da vjeruje da se ovlašteno lice kojem se prema internom aktu podnosi prijava, ili rukovodilac institucije, direktno ili indirektno dovode u vezu s koruptivnom radnjom.

Kada je moguće izvršiti javno prijavljivanje korupcije?

Poseban oblik zaštićenog prijavljivanja je javno objavljivanje ili na drugi način činjenje javno dostupnim informacija koje ukazuju na korupciju.

Javno prijavljivanje je moguće izvršiti pod uslovom da zviždač sumnja da će biti izložen štetnim mjerama od određenog lica, ili da, u slučaju zaštićenog prijavljivanja nadležnim autoritetima, neće biti preduzeta adekvatna radnja, ili da će dokazi i informacije biti prikriveni ili uništeni, ili da je ista informacija prijavljena nadležnim autoritetima, a u zakonskom roku nije preduzeta adekvatna mjera.

Zaštita zviždača od štetnih radnji

Kakvu zaštitu Zakon pruža zviždaču?

Zakon pruža administrativnu zaštitu zviždaču putem dodjeljivanja statusa zviždača licu koje u dobroj vjeri podnese prijavu o postojanju korupcije, bez obzira da li je nastupila neka od štetnih mjera ili prijavitelj samo sumnja da bi se prema njemu mogla preduzeti štetna mjera, kao i putem nalaganja korektivnih mjera institucijama radi otklanjanja štetnih radnji koje se poduzimaju prema zviždaču u vezi sa prijavom korupcije.

Zaštita se primjenjuje od dana podnošenja prijave korupcije.

U odnosu na koje štetne radnje zviždač uživa zaštitu?

Štetne radnje su one radnje kojima poslodavac nanosi štetu zaposlenom radi odvratanja od prijavljivanja korupcije. Štetna radnja je i radnja koja predstavlja čin odmazde protiv zaposlenog koji je prijavio sumnju na korupciju.

Prema Zakonu, štetne radnje obuhvataju donošenje rješenja o prestanku radnog odnosa, otkaz ugovora o radu, suspenziju s radnog mjesta, postavljanje na niže radno mjesto, proglašavanje prekobrojnim, pokretanje disciplinskog postupka, ucjenjivanje ili davanje negativne ocjene, stvaranje neprijateljskog radnog okruženja, te izostanak poslovnog angažmana.

Šta je i kako se dobiva status zviždača?

Status zaštićenog zviždača omogućuje zaštitu od štetnih radnji i dodjeljuje se prijavitelju korupcije koji u dobroj vjeri podnese prijavu o postojanju korupcije, bez obzira da li je nastupila neka od štetnih mjera ili prijavitelj samo sumnja da bi se prema njemu mogla preduzeti štetna mjera. Zaštićeno prijavljivanje teče od dana podnošenja prijave o korupciji.

Status zviždača dodjeljuje Ured za prevenciju korupcije i koordinaciju aktivnosti na suzbijanju korupcije Brčko distrikta u roku od roku od 30 dana od dana podnošenja zahtjeva u pisanoj formi uz prilaganje dokaza o prijavljivanju korupcije. Ured je dužan obavijestiti prijavitelja korupcije o dodjeli statusa zaštićenog zviždača.

Kakvu zaštitu može dobiti zviždač koji trpi štetne posljedice?

U slučaju da zviždač obavijesti Ured za prevenciju korupcije i koordinaciju aktivnosti na suzbijanju korupcije da je prema njemu preduzeta neka od štetnih radnji, ovaj ured je dužan zatražiti od organa javne uprave i institucije, javnog preduzeća, ustanove i drugog pravnog lica koje je osnovao Brčko distrikt, pravnog lica i preduzetnika relevantnu dokumentaciju.

Ako rukovodilac tvrdi da bi ista štetna radnja bila preduzeta prema zviždaču i u slučaju da nije podnio prijavu korupcije, dužan je to dokazati.

Ako, na osnovu dokumentacije dobivene od institucije i/ili zapisnika utvrdi da je prema zviždaču preduzeta neka od štetnih radnji, a koja je u vezi s podnošenjem prijave korupcije, Ured donosi instrukciju rukovodiocu organa javne uprave i institucije, javnog preduzeća, ustanove i drugog pravnog lica koje je osnovao Brčko distrikt, pravnog lica i preduzetnika, kako bi se otklonila štetna posljedica nanesena zviždaču.

Rukovodilac institucije dužan je izvršiti korektivnu mjeru s ciljem otklanjanja učinjene štetne radnje u roku od tri dana od dana zaprimanja instrukcije od Ureda za prevenciju korupcije i koordinaciju aktivnosti na suzbijanju korupcije. Rukovodilac institucije će se kazniti za prekršaj novčanom kaznom u iznosu od 1.000 do 3.000 KM ako ne postupi prema instrukciji Ureda za prevenciju korupcije i koordinaciju aktivnosti na suzbijanju korupcije i ne izvrši korektivnu mjeru.

Korektivna mjera je svaka radnja kojom se zabranjuju, ublažavaju ili uklanjaju uzroci ili posljedice štetnih radnji prema zviždaču u vezi s prijavljenim slučajem korupcije, a koja naročito obuhvata mjere osiguranja i nadoknadu štete.

Pod kojim uslovima se obustavlja zaštita?

U slučaju da se u toku postupka dokaže da zviždač prilikom podnošenja prijave korupcije nije postupao u dobroj vjeri, Ured za prevenciju korupcije i koordinaciju aktivnosti na suzbijanju korupcije će obustaviti pružanje zaštite zviždaču donošenjem odluke o obustavi pružanja zaštite zviždaču . Odluku o obustavi pružanja zaštite zviždaču za prevenciju korupcije i koordinaciju aktivnosti na suzbijanju korupcije dužna je dostaviti zviždaču i rukovodiocu institucije u kojoj je zviždač zaposlen.

Pravna pomoć

Koja pravna pomoć je na raspolaganju zviždačima?

Zakon ne reguliše pravnu pomoć zviždačima.

Prema Zakonu o kancelariji za pravnu pomoć Brčko distrikta Bosne i Hercegovine („Službeni glasnik Brčko distrikta BiH“ br. 19/07 i 23/19,

Kancelarija za pravnu pomoć Brčko distrikta Bosne i Hercegovine (<https://pkbd.pravosudje.ba/vstvfo/B/683/kategorije-vijesti/117903/117908>) je odgovorna za pružanje pravnih savjeta i zastupanje građana Distrikta slabog imovnog stanja i preduzima sve radnje pred pravosudnim institucijama Brčko distrikta BiH. Pravo na pravnu pomoć po imaju lica koja primaju socijalnu pomoć; nezaposleni, bez drugih redovnih primanja ili prihoda; lica lošeg imovnog stanja; djeca bez roditeljskog staranja; te lica lošeg zdravstvenog stanja bez prihoda. Kancelarija zastupa građane Distrikta slabog imovnog stanja u krivičnom, parničnom, vanparničnom, izvršnom, prekršajnom, upravnom postupku, u upravnim sporovima te drugim postupcima propisanim posebnim zakonima.

Transparency International BiH putem svog Centra za pružanje pravne pomoći u borbi protiv korupcije pruža pomoć i licima koja prijavljuju korupciju. Informacije o dostupnoj pomoći se nalaze na

<https://ti-bih.org/projekat/alac-centar-za-pruzanje-besplatne-pravne-pomoci-gradjanima/>

i <https://ti-bih.org/oblast/pravna-pomoc/>.

Koje dodatne informacije o postupku zaštićenog prijavljivanja korupcije su dostupne?

Informacije o načinima prijavljivanja korupcije se mogu naći u brošuri Agencije za prevenciju korupcije i koordinaciju borbe protiv korupcije na

http://apik.ba/acms_documents/Apik_antikorupcija_brosura.pdf.

Dodatni izvori informacija

Prema Zakonu, Ured za prevenciju korupcije i koordinaciju aktivnosti na suzbijanju korupcije Brčko distrikta je dužan da objavljuje posebnu godišnju listu sa spiskom organa javne uprave i institucija, javnih preduzeća, ustanova i drugih pravnih lica koje je osnovao Distrikt, pravnih lica i preduzetnika u kojima je prijavljena korupcija, uz navođenje nanesene štetne radnje kao i informacija o izvršenim korektivnim mjerama.